



A LA ROYNE.

MADAME, celuy qui peut recouurer quelque chose nouvelle des pays estranges, s'estime bien heureux d'en faire vn présent à quelque grand personnage, sçachant qu'en cela il le gratifie d'auantage que si luy donnoit quelque chose commune, encor qu'elle fust de grand pris & valeur: Ainsi ayant recourré de l'Italie quelques rares & singuliers patrons & ouurages de l'ingerie, & en ayant inuenté quelques vns, selon mon petit sçauoir, i'ay pensé, puis que ces choses la appartiennent principalement aux Dames, que ie ne ferois parauanture mal de m'aduancer & m'enhardir les présenter à vostre Majesté, tant à fin qu'elle y prenne quelque contentement, que pour le desir que i'ay que chacun connoise que si ces patrons & pourtraicts ameinent quelque profit & vtilité à la France, (comme l'on m'asseure qu'ils feront, veu que quelques vns moins parfaicts, & plus rudement ébauchez ont seruy & profité cy deuant) elle vous en doit principalement estre tenue, pource que ie les ay faicts pour vostre regard, & à fin d'en contenter vostre œil, tant gracieux & débonnaire, que volontiers il verra l'œuure & l'ouurier, qui ne desire rien plus que de faire chose qui luy soit agréable; & sous l'espérance que vous prendrez en gré ces inuentions, que ie m'attens vous augmenter en brief, Dieu aydent, de plusieurs autres différens patrons & pourtraits; ie prie Dieu, Madame vous donner heureuse & longue vie, & l'accomplissement de vos bons desirs

*Vostre très-humble & très-obeissant seruiteur
& subiect, le Clerc.*